



REPUBLIKA E KOSOVËS

KUVENDI I KOMUNËS-VUSHTRRI

**PROCESVERBAL
NGA MBLEDHJA E I E RREGULLT E KUVENDIT TË KOMUNËS SË VUSHTRRISË,
MBAJTUR MË 24 SHKURT 2022**

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:15.

Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Agron Përçuku, Alban Bajrami, Ali Januzi, Arlind Gogolli, Behar Duraku, Bekim Zabërgja, Blerina Shala, Bujar Pllana, Edona Gashi, Fakete Dushi, Fatmire Cecelia, Faton Hyseni, Galip Audiu, Gresa Muli, Gentiana Rama, Ilmi Azemi, Kushtrim Hyseni, Leonora Gërguri, Lorik Maxhuni, Mek Selaci, Melihate Basholli-Latifi, Mensur Kasumi, Mensur Kastrati, Mentor Hasani, Nasuf Aliu, Nurie Halili, Nurten Çerkezi-Gjyshinca, Refik Maloku, Shkelzen Xhaferi, Spasoje Stefanoviq, Sylejman Mehulli, Ymer Haradinaj dhe Zojë Hajrizi.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 35 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z. Ferit Idrizi, nënkryetari i komunës z. Shpëtim Zhegrova, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Melihate Basholli-Latifi, kryesuese e kuvendit - në deklaratimet e anëtarëve të kuvendit para rendit të ditës njoftoi se duke u bazuar në nenin 14, paragrafi 14.1.6. që legjitimon të drejtën e qytetarëve për të parashtruar çështjen para kuvendit, fjalën ia dha Ismaj Hazirit, për të referuar kërkesën e tij para anëtarëve të kuvendit.

Ismaj Haziri, qytetar i Komunës së Vushtrrisë - njoftoi kuvendin se në vitin 2012, kishte parashtruar kërkesë në Drejtorinë e Urbanizimit për pajisje me leje ndërtimore, pasi i kishte plotësuar të gjitha kushtet e parapara me legjislacionin në fuqi, dhe shikimit të vendit të ngjarjes dhe konstatimit të gjendjes faktike, Drejtoria e Urbanizimit akoma nuk ka vendosur lidhur me këtë kërkesë. Kësisoj zyrtarët e kësaj drejtorie e kanë zvarritur këtë çështje dhe kështu ai është maltretuar në aspektin psiko-fizik duke u sorollatur nga një zyrë në tjetrën por pa sukses. Ai pretendon se i ka plotësuar të gjitha kushtet ligjore për pajisje me leje ndërtimore, sipas ligjit apo legalizimit të tij. Drejtoria e Urbanizimit në saje të heshtjes administrative është duke prolonguar vendosjen e kësaj çështjeje dhe kësaj është duke bërë shkelje të drejtave të njeriut. Ai i propozon kuvendit të komunës të merret seriozisht me këtë çështje dhe ta obligojë Drejtorinë

e Urbanizmit që të veprojë, duke themeluar një komision komunal për verifikimin e kësaj çështjeje dhe gjetjen e një zgjidhjeje sa më të shpejtë.

Ferit Idrizi, Kryetar i komunës - sqaroi se kërkesa e z.Ismaj Haziri, do të trajtohet me prioritet përmes Drejtorisë së Urbanizimit dhe konfom kuadrit ligjore do të jep përgjigja brenda afatit të arsyeshëm.

Ymer Haradinaj, anëtar i kuvendit – duke ju referuar seancës së jashtëzakonshme të datës 21.10.2019, të thirrur me kërkesën e ish-kryetarit të komunës, ishte nxjerr vendimi për dhënien e pronës komunale në shfrytëzim me kompensim për 40 vite Kompanisë “Emona Center” pronë e cila gjendet në fshatin Gracë në sipërfaqe prej 3 hektarësh nga sipërfaqja e përgjithshme prej 5.37.00 ha. Kjo pronë i ishte dhënë në shfrytëzim kompanisë të cekur më lartë me qëllim të hapjes së biznesit për përpunimin e peshkut të detit, dhe ku kjo kompani vendore do të bashkëpunojë me Kompaninë kroate “Conex Trade” dhe në konsorcium me një kompani tjetër spanjolle. Ndër të tjera është thënë se vlera e investimit nga ky projekt do të jetë 7 milionë euro dhe do të punësoheshin 400-500 punëtorë kryesisht gra dhe vajza, kurse afati për fillimin e realizimit të këtij projekti ka qenë gjashtë muaj, ndërsa finalizimi i projektit do të bëhej brenda 24 muajve. Dhe sot kur jemi në muajin shkurt 2022, ky projekt as nuk ka filluar dhe nuk kemi asnjë informacion për të. Pyetja e tij për kryetarin e komunës është se a është takuar kryetari me përfaqësuesit e Kompanisë “Emona Center” për të diskutuar rreth këtij projekti për faktin se cili do të jetë epilogu i kësaj çështjeje dhe si do të veprohet me çështjen e asaj prone komunale. Pastaj më datë 16.04.2021 po ashtu në një mbledhje të jashtëzakonshme Kuvendi i Komunës së Vushtrrisë ka marrë vendim për dhënien e pronës në shfrytëzim afatgjatë për 99 vite në parkun industrial në fshatin Lumadh, subjekteve afariste për ushtrimin e veprimtarive biznesore, iu ka ndarë parcela 22 bizneseve dhe është thënë se do të punësohen 800 punëtorë, dhe prej asaj kohe kanë kaluar më tepër se 10 muaj dhe akoma nuk kemi vendosje të bizneseve në atë zonë industriale, për këtë çështje pyeti se deri ku kanë shkuar procedurat lidhur me vendosjen e bizneseve në këtë zonë industriale.

Adnan Lahu, anëtar i kuvendit – pyeti kryetarin e komunës, se përse nuk u ftuan dhe nuk ishin pjesëmarrëse shoqatat e dala nga lufta e UÇK-së në rastin e krenimit të 14 vjetorit të shpalljes së Pavarësisë së Kosovës.

Sylejman Mehulli, anëtar i kuvendit – pasi përshëndeti të pranishmit ngriti shqetësimin e qytetarëve të cilët i dërgojnë fëmijët e tyre në kopshtin e fëmijëve “Foleja”, për siç njoftohet nga ta përhapja e insekteve në këtë çerdhe, gjegjësisht insekteve humane-pleshtave tek fëmijët, për shkak ndoshta edhe të nivelit të higjienës. Në këtë kontekst i bëri thirrje Drejtorisë së Arsimit që të bëjë dezinfektimin e këtij objekti sa më shpejt që të jetë mundur për të rritur sigurinë dhe higjienën e këtij objekti edhe ashtu të vjetruar, dhe që ka nevoja reale për një renovim të atij objekti gjë që beson se është inkorporuar në buxhetin e komunës për vitin 2022.

Refik Maloku, anëtar i kuvendit – duke ju referuar premtimit elektoral të kryetarit të komunës, që në afat prej 6 muajsh të shtrihet rrejtja e ujësjellësit, kërkoi të di se deri ku kanë shkuar punët lidhur me këtë projekt. Lidhur me këtë ai njoftoi se gjatë periudhës 14 mujore sa ka shërbyer si drejtor i Drejtorisë së Shërbimeve Publike, janë realizuar rreth 4000 kyçje në rrjet dhe mëse 23 fshatra. Kanë mbetur edhe 1000 kyçje të ekonomikeve familjare pa u realizuar, dhe 6 apo 7 fshatra. Lidhur me këto a është i njoftuar kryetari i komunës dhe a ka ndonjë plan operativ për realizimin e këtij projekti

Ferit Idrizi, Kryetar i komunës - duke ju referuar pyetjeve të anëtarëve të kuvendit sqaroi me sa vijon: lidhur me dhënien e pronës në shfrytëzim kompanisë “Emona” dhe një kompanie kroate për përpunimin e peshkut, njoftoi se nuk ka pasur akoma ndonjë takim me këta përfaqësues të

këtyre kompanive, por së shpejti mendon të mban ndonjë takim, dhe u zotua se ato kompani që nuk i kanë realizuar obligimet, pronat që iu janë dhënë në shfrytëzim do t'i kthehen komunës. Lidhur me projektin e parkut industrial, njoftoi se janë gjetur parregullsi substanciale në kontratat e lidhura me operatorët ekonomik të cilat përbëjnë shkëlqje ligjore. Për secilën pronë të dhënë në shfrytëzim është lidhur një kontratë unike, e që nuk do duhej të ishte ashtu, sepse është dashur të kemi kontrata specifike për secilin biznes duke ia bashkëngjitur edhe planin e biznesit, ashtu që kontrata të jetë në harmoni me planin e biznesit. Ajo çka ka qenë shqetësuese është tek neni 9, pika 7 dhe 8 e kontratës ku thuhet se prona mund të shfrytëzohet për kolateral, mandej thuhet se operatori ekonomik mund të lëshojë në nënqira të parë të drejtën e marrjes në shfrytëzim afatgjatë për 99 vite, tërë objektin e kontratës apo një pjesë të tij. Bazuar në këtë, sqaroi se në bazë të Ligjit për Dhënien e Pronës në Shfrytëzim në mënyrë decitive thuhet se citojmë nenin 19: e drejta e pronës të dhënë në shfrytëzim nuk mund të bartet tek personat e tretë, që i bie se prona nuk mund të jepet me nënqira. Lidhur me këtë çështje është kërkuar dhe është marrë opinioni i zyrës ligjore në kuadër të komunës dhe kjo e fundit ka konstatuar se nenet e kontratës që i referohen tej bartjes apo nënqirasë bien në kundërshtim të plotë me dispozitat e Ligjit për Dhënien e Pronës në Shfrytëzim. Pastaj kur është pyetur zyrtari ligjor se si ka mundësi të lidhet një kontratë e tillë në kundërshtim me ligjin, ai është përgjigjur se kontratat e tilla fare nuk janë trajtuar në zyrën ligjore gjë që e shton dyshimin se këto kontrata janë bërë jashtë komunës. Kësisoj duke marrë për bazë të gjitha këto me 14 janar 2022 është thirrur një takim me të gjitha bizneset përfituese të pronës në atë zonë ekonomike, ku janë njoftuar se nuk janë kundër bizneseve, porse deri sa të bëhet revidimi i atyre kontratave dhe të qartësohen këto gjëra që të shfuqizohet neni i cili i lejon bartjen e pronës tek personat e tretë në nënqira dhe deri atëherë do të ndërpritet puna. Të gjeturat tjera janë se ka filluar tjetërsimi i pronave në zonën ekonomike, dhe kjo në të vërtetë përbën një shqetësim të madh. Lidhur me të gjitha këto, janë alarmuar organet gjegjëse, dhe lënda është duke u hetuar nga krimet e rënda ekonomike, andaj deri në një vendim të organeve kompetente ky projekt do të stopohet, ashtu që të bëhet revidimi i kontratave dhe ecet tutje. Sa i përket çerdhes së qytetit tha se Drejtoria e Arsimit duhet t'i ndërmarr menjëherë masat për dezinfektimin e atij objekti. Në fund tha se sa i përket furnizimit me ujë të pijshëm njoftoi se ka realizuar takime me kompaninë e ujësjellësit me qëllim të sanimit të gjendjes në terren, dhe gjetjen e zgjidhjes sa i përket fshatrave që kanë terren kodrinor-malor, ku uji nuk shkon me rënie të lirë, sidomos në pjesën lindore të komunës.

Adnan Lahu, anëtar i kuvendit – lidhur me çështjen e dhënies së pronës komunale në shfrytëzim, për ndërtimin e fabrikës së peshkut, shtoi se ka qenë efekti i pandemisë që ka ndikuar në zhvillimin e këtij projekti, dhe vlerësoi se është e drejtë e komunës që të denoncoj ato kontrata kur operatorët ekonomik nuk i përmbushin kushtet dhe obligimet për investime që janë paraparë në kontratë. Pastaj sa i përket zonës ekonomike, sqaroi se nëse për një çështje të caktuar ekziston një ligj specifik, atëherë ai ligj do të ketë epërsi për atë çështje duke i përjashtuar ligjet tjera, në rastin konkret ekziston Ligji për Zonat Ekonomike që e rregullon këtë çështje, neni 11, pika 8 e këtij ligji thotë: E drejta e shfrytëzimit brenda zonës ekonomike nuk mund t'i bartet ndonjë personi të tretë pa pëlqimin e themeluesit ose, në rast të mbikëqyrjes të zonës ekonomike përmes partneritetit publiko- privat, të personit të autorizuar për ndërtimin dhe mbikëqyrjen e zonës ekonomike, andaj në rastin tonë themelues i zonës ekonomik është Komuna e Vushtrrisë dhe me pëlqimin e kësaj të fundit mund të tejbartet kjo pronë. Në fund tha se komuna jonë i ka marrë përvojat nga Komuna e Drenasit sa i përket zonës ekonomike dhe kontrata për këtë çështje është marrë nga modeli i Drenasit.

Ferit Idrizi, Kryetar i komunës - tha se ligj specifik për dhënien e pronës në shfrytëzim është Ligji për Dhënien e Pronës në Shfrytëzim, ndërsa Ligji për Zonat Ekonomike përcakton norma

dhe standarde sa i përket funksionimit të zonave ekonomike. Sa i përket të gjeturave lidhur me këtë zonë ekonomike, ato janë fakte dhe janë konstatuar nga juristët e zyrës ligjore, që i kanë adresuar përmes opinionit të tyre ku thuhet se ka pasur shkelje substanciale gjatë hartimit të kontratave mes komunës dhe operatorëve ekonomik. Tutje vlerësoi se në rastin konkret jemi duke folur për prona komunale të cilat janë dhënë në shfrytëzim, por duhet të kemi parasysh se pronat duhet t'u jepen në shfrytëzim atyre që kanë dhe investojnë kapitalin e tyre për të hapur vende pune, e jo për përfitime personale dhe tjera. Në fund sa i përket ftesës së shoqatave të dala nga lufta e UÇK-së, njoftoi se ato janë ftuar dhe iu kanë bërë ftesë që ata të dërgojnë një përfaqësues që të jetë pjesë e këshillit organizativ, ashtu siç edhe e kërkon ligji, por Shoqata e familjeve të dëshmorëve e ka dërguar përfaqësuesin e tyre z.Enver Isufin i cili është pjesë e këshillit, e i cili ka marrë pjesë në dy apo tri takime, por e vërteta është se ata janë ftuar të gjithë që të jenë pjesë e organizimeve dhe aktivitetëve për nder të 14 vjetorit të Pavarësisë së Kosovës, por hatërmbetja e tyre ka qenë se përse të gjitha këto shoqata nuk janë në këshillin organizativ, gjë të cilën nuk e lejon Ligji i Protokollit të Shtetit. Në fund u zotua se këto shoqata do ta kenë përkrahjen e plotë të tij si kryetar i komunës.

Ymer Haradinaj, anëtar i kuvendit – pyeti se prej 22 bizneseve që janë përfituese të pronës në zonën ekonomike a ka ndonjë biznes që është tërhequr, duke mos dashur që të investojë. Pastaj adresoi kërkesën e banorëve të fshatit Lumadh që të rregullohet kanalizimi dhe një urë e cila është dëmtuar gjatë ndërtimit të zonës ekonomike, kërkoj nga komuna dhe punëkryerësi që ta bëjnë sanimin e gjendjes duke e rregulluar urën dhe kanalizimin.

Ferit Idrizi, Kryetar i komunës - sqaroi se deri tani nuk kemi ndonjë operator ekonomik që ka njoftuar se tërhiqet nga prona. Ndërsa sa i përket rregullimit të urës dhe kanalizimit do të shikohet mundësia për futje në projekte kapitale për ndërtimin e tyre dhe sanimin e asaj gjendjeje.

Faton Hyseni, anëtar i kuvendit – pyeti drejtorin e Shërbimeve Publike, lidhur me kyçjen e njësorëve për ndriçimin publik, dhe pasi ka pyetur në KEDS përgjigjja e tyre ka qenë se nuk kanë kërkesë nga komuna për mbulimin e shpenzimeve, konkretisht bëhet fjalë për rrugët në fshatin Stanoc i Epërm rr. “Ferat Haxha”, rr. “Rrahim Kosumi”, rr. “Sadik Mala”, rr. “Caka”.

Benjamin Shala, drejtor i DSHP-së - sqaroi se ndër kërkesat e para që ka nënshkruar janë ato për pajisje me njësor elektrik për ndriçim publik, dhe të njëjtën e ka adresuar në KEDS, por sa ai ka informacion prolongimi po ndodh për shkak të krizës energjetike.

Ilmi Azemi, anëtar i kuvendit – tha më herët nuk ishte deklaruar sa i përket zonës ekonomike në Lumadh, por e vërteta është dhe ai ka bindjen se kryetari Idrizi dhe qeveria komunale është e interesuar që ky projekt të zhvillohet dhe të funksionalizohet në tërësi, sepse është investimi më i madh në Komunën e Vushtrrisë që nga paslufta. Tutje shtoi se çështja e mospajtimeve lidhur me kontratat është evidente dhe dëshiron që të sqaron para opinionit se personalisht ka qenë pjesë e komisionit dhe krenohet me punën që ka bërë komisioni. Ndarja e pronave është bërë konform kriterëve, dhe konsideron se funksionalizimi i këtij projekti është në interes të përgjithshëm sidomos në këtë kohë të krizës ekonomike të papunësisë dhe varfërisë. Më tej sqaroi se dhënia e pronës në shfrytëzim ka kaluar të gjitha fazat ligjore, duke përfshirë Ministrinë e Administrimit të Pushtetit Lokal, e cila me vendimin numër 020-363/3 të datës 30.4.2021, ka dhënë opinionin e saj përmes Ministrisë së Tregtisë dhe Industrisë si kompetente e lëndës dhe si konkluzion është nxjerrë se: pas trajtimit të kërkesës së MAPL-së për vlerësimin e ligjshmërisë të vendimit të kuvendit të Komunës së Vushtrrisë për dhënie e pronave në shfrytëzim në zonën ekonomike në Lumadh, Ministria e Industrisë, Tregtisë dhe Ndërmarrësisë jep opinion se zhvillimi i këtij projekti është bërë konform legjislacionit në fuqi. Çështja e kontratave është kompetencë ekskluzive e kryetarit të komunës, dhe se një nga nenet e kontratës thotë se palët më vullnetin e tyre mund ta ndryshojnë

dhe modifikojnë kontratën në mes tyre, që do të thotë se palët në procedurë mund të përmirësojnë ndonjë gabim teknik ose përmbajtjesor i kontratës dhe të vazhdojnë procedurat sepse vetëm një investitor do të investojë rreth 4,800,000.00 € në atë zonë ekonomike. Çështja e bartjes së pronësisë është diskutabile ndoshta në aspektin juridik, por në aspektin ekonomik është shumë në rregull, kjo për faktin se si do të vjen një investitor i jashtëm të investojë në një shoqëri aksionare në pronën e dikujt tjetër, ndoshta këtu gabimi është se është dashur të jetë se kjo të bëhet me aprovimin e komunës e që kontrata mund të modifikohet e që nuk barten kurrfarë pasojash me pëlqimin e të dyja palëve. Andaj si përfundim beson se nuk ka pasur nevojë që t'i bëhet gjithë ky pompozitet dhe çështja të zvarritet duke e dërguar në prokurori, sepse ky arazhman-projekt i ka kaluar të gjitha fazat ligjore. Ai apeloj se aksenti do duhej të ishte tek pranimi teknik i këtij projekti, mbushja me zhavorr e terrenit të parkut industrial e të ngjashme. Krejt në fund ai deklaroi se nuk beson se dikush ka pasur tendencë që dikë ta dëmtojë dhe se shpreson se ky projekt të vazhdojë sa më shpejt që të jetë e mundur.

Ferit Idrizi, Kryetar i komunës - sqaroi se sa i përket komisionit nuk ka dyshim se punën e kanë kryer në mënyrë profesionale, dhe nuk ka ndonjë vërejtje, por problematika është tek lidhja e kontratave, sepse këtë e ka konstatuar edhe zyra ligjore derisa ata kanë dhënë mendimin e tyre profesional ai nuk dëshiron të lëshohet në interpretime. Ai sqaroi se nuk ka tendencë të bllokimit të këtij projekti, por dëshiron që të ketë spastrim sa i përket anës ligjore të kësaj çështjeje.

Bekim Zabërgja, anëtar i kuvendit – tha se zona ekonomike është një projekt më i madh që nga paslufta, ajo është financuar nga Ministria e Tregtisë e cila në atë kohë është udhëhequr nga Nisma Socialdemokrate. Pastaj lidhur me kontrata vlerësoi se anëtarët e kuvendit nuk janë të informuar se si janë lidhur ato kontrata sipas cilave kriteret, standarde dhe cilat specifikacione janë marrë për bazë. Kontratat nuk mund të ndryshohen, ato duhet të jenë konstante, përderisa një gjë të tillë nuk e bënë kuvendi. Në momentin e lidhjes së këtyre punëve juridike, në kontratë duhet të parashihen fillimi i zbatimit të punëve, afatet e realizimit, plani biznesor, investimi dhe specifikime tjera. Mandej operatorët ekonomik duhet ta kishin dhënë garancionin bankar me qëllim që të kemi siguri sa i përket realizimit të investimeve. Ai e përgëzoi kryetarin e komunës që lëndën e ka dërguar në prokurori dhe ky projekt duhet të stopohet deri në një vendim të prokurorisë, ashtu që çështjet të spastrohen nga elementet e kundërligjshme.

Adnan Lahu, anëtar i kuvendit – tha se sikurse edhe në mbledhjen e kaluar edhe në këtë mbledhje kemi pika shitesë, që janë dërguar në të ndryshme pa kaluar në procedura ligjore. Ai nuk e di nëse këto pika kanë ndonjë urgjencë të cilat janë sjellë kështu pa ndonjë arsytim të bazuar.

Ferit Idrizi, Kryetar i komunës - sqaroi se nuk është ithtar që pikat të sillen me vonesë, pa kaluar procedurat ligjore, por sido që të jetë kjo le të mbetet në vullnetin e kuvendit se a dëshiron që t'i shtyjë përpara. Në arsyetimin e tij ai njoftoi se çështja e tregut është e natyrës urgjente, sepse kemi të bëjmë me një donacion, sepse lokacioni ku atje është paraparë ndërtim i tregut ka qenë në pronësi të AKP-së. Lidhur me rekomandimin për shfuqizimin e pjesshëm të vendimit për dhënien e kioskave në shfrytëzim, njoftoi se është themeluar një komision në ç' rast është konstatuar se kemi të bëjmë me nënqira të atyre pronave dhe kësaj duhet të bëhet shfuqizimi i pjesshëm i vendimit me të cilin janë dhënë në shfrytëzim ato prona.

Sylejman Mehulli, anëtar i kuvendit – tha se është mirë që të flaken praktikat e këqija të procedimit të pikave të rendit të ditës, sepse kjo ndikon edhe në marrjen vendimeve të paanalizuara mirë, dhe të gabuara. Për çështje për të cilat ekziston arsytimi se kanë urgjencën e vet nuk janë që t'i bllokojnë sikurse është puna e tregut të gjelbër që ka qenë prioritet edhe i subjektit të tij politik, andaj kjo duhet të procedohet. Mandej shtoi se është joserioze që një pikë e rendit të ditës sikur është propozimi për subvencione të ndryshohet tri herë brenda një periudhe shumë të shkurtër

në KPF vjen një material tjetër, mandej në adresë elektronike dërgohet një tjetër, ndërsa sot brenda seancës në material fizik vjen krejt diçka tjetër. Në fund shtoi se pika që nuk kanë urgjencë mos të procedohen fare, por të mbesin në mbledhje në afat të rregullt.

Adnan Lahu, anëtar i kuvendit – kërkoi nga kryetari i komunës që mos të ngatërrohet tregu për prodhues vendor, me tregun që ka pasur të ndërtohet në zonën tek Interex, sepse janë dy projekte krejt të ndryshme. Lokacionin për tregun për prodhime vendore e përkrahin sepse në atë sipërfaqe do të mund të ndërtohej një treg i mirë. Por ai kërkoi nga kryetari i komunës që ta publikojë vendimin e AKP-së që lidhet me lejimin e zhvillimit të projekteve në prona të AKP-së që gjenden në procedurë të shpronësimit për qëllim të interesit të përgjithshëm.

Ferit Idrizi, Kryetar i komunës - tha se do t'i dërgojë anëtarëve të kuvendit gjithë korrespondencën që ka pasur me Agjencinë Kosovare të Privatizimit, dhe sqaroi se vendimi të cilit i referohet anëtari i kuvendit z.Lahu ka të bëjë me një vendim të kryeministrit për inicimin e procedurave të shpronësimit me qëllim të bartjes së pronësisë tek komuna për pronat që tani gjenden në emër të AKP-së.

Albanez Tahiraj, drejtor i DGJKP-së - tha se kur t'i referohemi një dokumenti-akti, duhet t'i shkojmë deri në fund, e jo duke e cituar pjesërisht, duke tentuar të keqpërdoret, dokumenti për të sajuar një gjendje që në fakt nuk ekziston. Lidhur me këtë sqaroi se vendimi që anëtari i kuvendit z.Lahu i referohet, i lëshuar nga AKP-ja, ka edhe një shkresë përcjellëse ku është obliguar komuna, që brenda afatit tridhjetëditorë të paguajë 20 % të shumës që del nga procesi i privatizimit, por kjo pagesë nuk ka ndodhur dhe atëherë në qeverisje ka qenë LDK-ja. Komuna përkatësisht qeveria aktuale e komunës, ka komunikuar me AKP-në dhe aktualisht kemi dy alternativa për të lëvizur përpara, të aplikohet këmbimi i pronave mes komunës dhe AKP-së, apo përmes shpronësimit dhe kjo mund të vërtetohet me fakte dhe prova. Pengesat në këtë proces kanë dal sepse qeveria e kaluar nuk i ka përmbushur obligimet e 20% dhe ky proces ka mbetur i pafinalizuar.

Adnan Lahu, anëtar i kuvendit – tha se në të kaluarën janë zhvilluar projektet pikërisht në pronat e AKP-së, siç është ndërtimi i gjimnazit në Vushtrri dhe një objekt i QMF-së po ashtu në Vushtrri që janë ndërtuar në të kaluarën dhe tani po dalin pengesa tjera që janë të natyrës së njëjtë.

Melihate Basholli-Latifi, kryesuese e kuvendit - propozoi që pika që lidhet me ndryshimin e vendimit për themelimin e KKS-së të tërhiqet nga rendit i ditës, ndërsa dy pikat tjera të mbesin si pjesë e rendit të ditës pasi e kanë rëndësinë dhe urgjencën e vet.

Në fund të debatit jashtë rendit të ditës dhe për rendin e ditës, kuvendi pas votimit me 33 vota “për” 2 vota “kundër” aprovoi këtë:

REND DITE

1. Shqyrtimi dhe aprovimi i procesverbalit nga mbledhja e jashtëzakonshme e Kuvendit të Komunës së Vushtrrisë, mbajtur më datë 31 janar 2022;
2. Shqyrtimi i Informatës për gjendjen e sigurisë në Komunën e Vushtrrisë për vitin 2021;
3. Shqyrtimi i Propozim – vendimit për aprovim të Planit pesëvjeçar të menaxhimit të mbeturinave 2022 – 2026;
4. Shqyrtimi i Informatës për shërbimet shëndetësore për vitin 2021 në Komunën e Vushtrrisë;
5. Propozim – vendim për lirim nga pagesa e taksës për mbeturina, për familjet përfituese të asistencës sociale;
6. Propozim – vendim për ndarjen e subvencioneve;

7. Shqyrtimi i Propozim – vendimit për aprovimin e nismës, për identifikimin e shtëpive – shkolla (themelimi i komisionit);
8. Shqyrtimi i rekomandimit për shfuqizimin e pjesshëm të vendimi të kuvendit me Nr. protokollit 01Nr.125/14 i datës 28.05.2014, apo shkëputjes së kontratave për dhënien në shfrytëzim të kiosqeve;
9. Shqyrtimi i Propozim – vendimit për ndryshimin dhe plotësimin e vendimit për themelimin e Këshillit Komunal për Siguri në Bashkësi;
10. Shqyrtimi i Propozim – vendimit për caktimin e lokacionit për ndërtimin e tregut të gjelbër të prodhuesve vendorë në Komunën e Vushtrrisë;
11. Të ndryshme.

1. Shqyrtimi dhe aprovimi i procesverbalit nga mbledhja e jashtëzakonshme e Kuvendit të Komunës së Vushtrrisë, mbajtur më datë 31 janar 2022

Sylejman Mehulli, anëtar i kuvendit – paraqiti vërejtje për procesverbalin e mbledhjes të datës 31 janar 2022, të cilat u inkorporuan në procesverbal.

Pas shqyrtimit të kësaj pike të rendit të ditës, Kuvendi me vota “unanime” aprovoi procesverbalin nga mbledhja jashtëzakonshme e Kuvendit të Komunës së Vushtrrisë, mbajtur më datë 31 janar 2022, me korrigjimin e lartshënuar.

2. Shqyrtimi i Informatës për gjendjen e sigurisë në Komunën e Vushtrrisë për vitin 2021

Ali Januzi, anëtar i kuvendit – pyeti se a ka ankesa të qytetarëve ndaj policisë që operojnë në Komunën e Vushtrrisë.

Nasuf Aliu, anëtar i kuvendit – pyeti se çfarë masash janë duke u ndërmarr për trajtimin e problemit me qentë endacakë, dhe cilat janë arsytet e rritjes së numrit të veprave të rënda penale.

Ferit Idrizi, kryetar i komunës - njoftoi se është lidhur një memorandum i mirëkuptimit mes komunës dhe një organizate zvicerane për trajtimin e qenve endacakë ku do të trajtohen deri në 600 qenë endacakë. Por lidhur me këtë problematikë do ta kontaktojë kryetarin e komunës së Mitrovicës dhe atë të Obiliqit, për shkak të pozitës gjeografike që kemi ku mund të ketë lëvizshmëri të tyre prej një komune në komunën tjetër. Ideja do të ishte që të shkohet në një projekt me bashkëfinancim për ndërtimin e një kampi të përbashkët për trajtimin e tyre.

Ymer Haradinaj, anëtar i kuvendit - kërkoi nga drejtorja kompetente komunale që të bëjë kërkesë në KEDS për renovimin dhe ndërrimin e shtyllave elektrike dhe për renovimin e rrjetit pasi ai po paraqet rrezik për qytetarët. Si kryetar i fshatit Stanoc i Epërm ka bërë kërkesë në KEDS për renovimin e shtyllave dhe rrjetit në disa lagje, por nuk ka marrë përgjigje nga ana e KEDS-it. Ai apeloj që të mbahen takime bashkëpunuese me policinë për ngritjen e vetëdijes për shfrytëzimin e nënkalimeve siç kishte ndodhur një në vitin 2018 që kishte rezultuar si mjaft i suksesshëm.

Reshat Kovaçi, komandant i Stacionit Policor në Vushtrri - paraqiti sqarime të përgjithshme lidhur me informatën për gjendjen e sigurisë në Komunën e Vushtrrisë për vitin 2021, duke iu përgjigjur temave të ngritura nga anëtarët e kuvendit. Lidhur me pyetjen se a ka ankesa ndaj zyrtarëve policorë, konfirmoi se ka ankesa në vazhdimësi dhe të njëjtat adresohen në stacionin policor dhe në Inspektoratin Policor të Kosovës. Ankesat që dërgohen në stacionin policor, adresohen në inspektoratin policor për shqyrtim se a përbëjnë element të veprës penale të rëndë apo shkelje të lehta disiplinore. Në aspektin statistikor, del se kemi rënie të numrit të veprave

penale kundër pasurisë-vjedhje, dhe grabitjeve dhe kësisoj mendojmë se kemi indikator pozitiv në këtë relacion.

3. Shqyrtimi i Propozim – vendimit për aprovim të Planit pesëvjeçar të menaxhimit të mbeturinave 2022 – 2026

Benjamin Shala, drejtor i DSHP-së-tha se Plani pesëvjeçar i menaxhimit të mbeturinave 2022 – 2026, është hartuar nga një grup i ekspertëve në kuadër të DSHP-së dhe ftoi kryesuesin e grupit që ta bëjë prezantimin e këtij plani.

Islam Latifi, zyrtar në DSHP - pasi i përshëndeti të pranishmit tha se, kam nderin dhe kënaqësinë, që në cilësinë e koordinatorit të grupit punues për hartimin e Planit Komunal për Menaxhimin e Mbeturinave, të paraqesë synimet dhe objektivat, si dhe punën e deritanishme që është bërë në hartimin e këtij plani strategjik pesëvjeçar. Që nga hyrja në fuqi e Ligjit për Mbeturinat (Ligji nr.04/L-060), sipas politikave të Qeverisë së Kosovës, grumbullimi dhe transportimi i mbetjeve, si dhe shërbimet tjera të pastrimit, i janë deleguar autoriteteve lokale. Pra ky ligj delegon më shumë autoritet dhe përgjegjësi te qeverisja lokale sa i përket menaxhimit të mbeturinave. Pra në këtë kuadër janë qartësuar edhe përgjegjësitë dhe detyrimet e komunës për zbatimin e dispozitave të këtij ligji. Inputet e para për menaxhimin e mbetjeve Komuna e Vushtrrisë i ka marrë nga partneriteti i ndërtuar me Komunën e Vaxjo- s, i cili partneritet ka ndikuar dukshëm në ngritjen e kapaciteteve të grupit punues, për formësimin e idesë dhe konceptit për menaxhimin e mbetjeve si shërbim prioritar për qytetarët. Planifikimi krahas edukimit, krahas aspekteve financiare dhe legjislative, është përcaktuar si një nga (katër) shtyllat kryesore vendimtare për zbatimin e politikës dhe të strategjisë për menaxhimin e mbetjeve, dhe thelbësore për të garantuar qëndrueshmërinë dhe suksesin e menaxhimit të tyre në nivel lokal dhe qendror. Prandaj, Drejtoria për Shërbime Publike, me qëllim të implementimit të kësaj infrastrukture ligjore, krijimit të një ambienti të pastër dhe të shëndoshë përmes menaxhimit të plotë të mbeturinave, në bashkëpunim me GAC, ka hartuar Planin për Menaxhimin e Mbeturinave brenda territorit të Komunës së Vushtrrisë, duke synuar periudhën pesëvjeçare 2022-2026. Ky plan i menaxhimit të mbeturinave korrespondon me Ligjin për mbeturinat dhe Strategjinë kombëtare për menaxhimin e mbeturinave, si një plan afatmesëm, përderisa këtij plani i ka paraprirë plani i mëhershëm komunal pesëvjeçar 2016-2020 i miratuar nga kuvendi komunal i atëhershëm, në mënyrë unanime, mirëpo i shoqëruar me skepticizëm në realizmin e suksesshëm të tij, për shkak të marrjes së përgjegjësi nga ndërmarrja publike “Uniteti” dhe bartjes së tyre në komunë, që nënkuptonte marrjen përsipër të inkasimit dhe pagesën e faturës mujore për kryerjen e shërbimit nga ndërmarrja. Përmes planit të kaluar për menaxhimin e mbeturinave, suksesshëm kemi arritur shtrirjen e ofrimit të shërbimit për menaxhimin e të gjitha mbeturinave komunale në tërë territorin e Komunës së Vushtrrisë, përcaktimin e shkallës së gjenerimit të mbetjeve për pesë vitet e kaluara dhe një varg çështjesh të domosdoshme siç ishin: krijimi i një kuadri institucional organizativ dhe rregullativ, krijimi dhe zhvillimi i një softweri, pra sistemit të menaxhimit të të dhënave, kontraktimin e shërbimit të grumbullimit të mbeturinave me kompaninë “Uniteti” në bazë të kapaciteteve të saj dhe në bazë të planit operativ, mënyrën e llogaritjes së kostos dhe nevojave financiare përmes hartimit të planit financiar, fushatën e vetëdijesimit publik, si dhe në ndërkohë verifikimin e fizibilitetit të këtij projekti. Gjithashtu gjatë hartimit të planit të ri komunal 2022-2026, është bërë një studim përmbajtjesor i gjendjes ekzistuese dhe mundësive apo alternativave të reja në fushën e menaxhimit të mbeturinave. Në bashkëpunim të plotë me përfaqësuesit e “Unitetit” kemi arritur të definojmë sasinë e gjeneruar të mbetjeve në tërë territorin e komunës, e që është 54.6 t/ditë, sasi

e cila aktualisht deponohet në deponinë regionale në Gërmovë që në bazë vjetore është 19 929 t/vit, pastaj sasinë dhe përqindjen e mbetjeve nga amvisëria dhe mbetjeve tjera qoftë ato të riciklueshme, qoftë mbetjet tjera në raport me totalin e sasisë së gjeneruar. Përveç kësaj ky plan në përmbytjen e saj përmban edhe shkallën e rritjes së sasisë së gjenerimit të mbetjeve e bazuar ekskluzivisht në shkallën e rritjes ekonomike përmes BPV dhe shkallën e rritjes së popullsisë sipas regjistrimit të vitit 2011. Nga përvoja dhe praktikat e shteteve të zhvilluara siç është Komuna e Växjö-s së Suedisë, kemi vërejtur se ata kanë ndërtuar një sistem tërësisht të integruar të mbeturinave dhe ujërave të zeza, në ç rast mbi 90% e mbetjeve ripërdoren në industri, një pjesë për prodhimin e biogazit, një pjesë për prodhimin e energjisë elektrike, ndërsa vetëm 8-10 % e sasisë së mbeturinave deponohet në deponi. Prandaj edhe synimi ynë është që brenda këtij pesëvjeçari të zvogëlojmë dukshëm sasinë e mbeturinave që duhet të deponohet në deponi përmes promovimit dhe praktikimit të ndarjes së mbeturinave që në burim, pastaj kompostimit të mbetjeve organike dhe riciklimit të mbetjeve të riciklueshme, të rrisim shkallën e inkasimit dhe eliminimit e qëndrueshëm të deponive ilegale. Përmes kompostimit të mbetjeve organike në komposter, ekonomitë familjare do të përfitonin prodhimin e humusit apo plehrave, ndërsa në fushën e riciklimit të mbetjeve të riciklueshme (siç është letra, plastika dhe metalet) ne tashmë e kemi bërë hapin e parë, përmes ndërtimit të qendrës për grumbullimin dhe paketimin e këtyre mbetjeve, e cila aktualisht paketon rreth 40 tonë në vit. Prandaj bazuar në nevojën imediate për menaxhimin e mirëfilltë të mbetjeve, kërkojmë vëmendjen e theksuar për miratimin e këtij plani dhe hapjen e mundësive të reja për menaxhim të qëndrueshëm të mbetjeve.

Refik Maloku, anëtar i kuvendit - tha se hartimi i këtij plani është model i cili mund të merret edhe nga komunat tjera, dhe për këtë nuk kemi inate politike për ta pranuar si sukses sepse i gëzohemi suksesit të komunës sonë. Nëse ky plan do të krahasohej me planin për studimin e efekteve të pandemisë të cilin e kishte sjellë ish - kryetari i komunës, e për të cilin ishin paguar 140,000.00 €, atëherë del në pah se ky plan për menaxhimin e mbeturinave, i cili sot po shqyrtohet në kuvend është pakrahasimisht më i mirë, më informues dhe më solid për Komunën e Vushtrrisë. Plani për studimin e efektit të pandemisë i hartuar në qeverisjen e Xhafer Tahirit dhe i mbështetur edhe nga PDK-ja në Vushtrri nuk ka qenë gjë tjetër veçse një farsë dhe një instrument për keqpërdorim financiar të parasë publike në Komunën e Vushtrrisë.

Ali Januzi, anëtar i kuvendit - pyeti drejtorin e DSHP-së se në kuadrin e kujt funksionon punësoria për paketimin e letrës në fshatin Bukosh, si dhe sa punëtorë ka ajo fabrikë.

Ilmi Azemi, anëtar i kuvendit – sqaroi se në kohën kur është votuar vendimi për studimin e efektit të pandemisë, kemi menduar se po votojmë diçka pozitive për Komunën e Vushtrrisë dhe se nuk i kemi ditur prapaskenat e tij. Por i kujtoi z.Malokut se gjithçka që kishte sjellë në kuvend Xhafer Tahiri, grupi i Vetëvendosjes ia kishte bërë “animin akoma pa hapur gojën ai”.

Shkelzen Xhaferi, anëtar i kuvendit – tha se e mbështesin aprovimin e këtij plani dhe njoftoi se hartimi i këtij plani ka filluar në kohën e qeverisjes së LDK-së.

Refik Maloku, anëtar i kuvendit - tha se aty ku ka pasur interesa grupore e klanore, grupi i Lëvizjes Vetëvendosje asnjëherë nuk ka votuar sikurse ishte ai për 140,000.00 €, por edhe ai i ndarjes së parcelave në Lumadh, këto i kishte nxitur vet Xhafer Tahiri dhe i mbështetur edhe nga PDK-ja.

Ilmi Azemi, anëtar i kuvendit – tha se ka respekt për kolegun e tij z.Refik Maloku, por atë ose ka filluar ta lëshojë kujtesa ose fletë të pavërteta, sepse mjetet për atë plan janë votuar pothuajse unanimisht me përjashtim të z.Lorik Maxhuni i cili kishte votuar kundër.

Benjamin Shala, drejtor i DSHP-së - njoftoi se punëtorja në fshatin Bukosh, është menduar të funksionojë si ndërmarrje sociale, por akoma nuk e ka marrë këtë status, ajo bashkëpunon me Ndërmarrjen “Uniteti” dhe ka 2 punëtorë.

Në fund të debatit lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim aprovet Plani Pesëvjeçar i Menaxhimit të Mbeturinave 2022-2026.
 2. Qëllimi i hartimit të këtij plani është të përmirësojë gjendjen e menaxhimit të mbeturinave dhe në përgjithësi përmirësimin e gjendjes mjedisore në Komunën e Vushtrrisë, të ndihmojë në konsolidimin e infrastrukturës ligjore sa i përket çështjeve të ruajtjes së mjedisit.
 3. Obligohet Kryetari i komunës dhe Drejtoria për Shërbime Publike që të ndërmarrë masa për implementim të këtij plani në pajtim me autorizimet dhe përgjegjësitë ligjore, duke bashkëpunuar me gjithë akterët përgjegjës në fushën e menaxhimit të mbeturinave dhe mirëmbajtjes së ambientit.
 4. Pjesë përbërëse e këtij vendimi është dokumenti me emërtimin Plani Pesëvjeçar i Menaxhimit të Mbeturinave 2022-2026, i Komunës së Vushtrrisë.
 5. Për zbatimin e këtij vendimi obligohen: Drejtoria për Shërbime Publike, Drejtoria për Urbanizëm dhe Mbrojtje të Mjedisit dhe Drejtoria e Inspektiveve.
 6. Ky vendim hynë në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe pas publikimit në faqen zyrtare të Komunës së Vushtrrisë.
4. Shqyrtimi i Informatës për shërbimet shëndetësore për vitin 2021 në Komunën e Vushtrrisë

Sylejman Mehulli, anëtar i kuvendit – tha se gjithëherë do të duartrokasim atëherë kur qeverisja komunale do të bëjë punë të mira dhe në interes qytetar, por gjithëherë do të kritikojnë kur nuk punohet dhe bëhen punë jo të mira në Komunën e Vushtrrisë. Andaj shtoi se informata për shërbimet shëndetësore për vitin 2021 në Komunën e Vushtrrisë, ka ardhur në Komitetin për Politikë dhe Financa pothuajse në nivel qesharak, më pas është kërkuar që ajo të plotësohet, por prapëseprapë lë shumë për të dëshiruar, dhe kjo duke filluar që nga aspekti i drejtshkrimit, i cili në një hartim me shkrim nuk do të mund të kalonte me notë pozitive, e deri tek titujt dhe nëntitujt që nuk dihet se ku fillojnë dhe nuk kemi një ndarje strukturore dhe po ashtu ka gabime përmbajtësore që lidhen me rrjedhën e fjalive në këtë informatë. Niveli i hartimit të kësaj informate është për keqardhje dhe kjo nuk nënkupton kritikë me karakter personal, ndaj askujt e veçanërisht ndaj profesionistëve shëndetësorë që kanë dhënë maksimumin, sidomos gjatë etapës së pandemisë. Tutje shtoi se komiteti ka kërkuar që kjo informatë të plotësohet, por nuk kemi kërkuar të ofrohet, sepse nuk ka qenë në rend të ditës informatë për shërbimet në QPS dhe për shërbimet e Qendrës Rezidenciale, të cilat janë inkorporuar në këtë informatë. Pastaj mungon numri i faqeve dhe kjo e bënë të vështirë të adresohen vërejtjet pasi që nuk mund t’i referohesh numrave të faqeve. Referim në vite diku është viti 2020 e diku viti 2021 dhe kjo përbën dyshim se kjo informatë është bërë në

stilin copy-past. Në një rën nga faqet e informatës thuhet: jemi përpjekur si menaxhment që nga fillimi i vitit 2021 në bashkëpunim me DSHPS-në dhe IRSHPK-Mitrovicë, dhe më tej thuhet kemi njoftime zyrtare, këtu kemi përgjysmim të fjalive dhe nuk ka lidhje logjike fjalia. Mandej dinamika e punëve thuhet së është bërë në versionin t'u pa t'u ba, dhe kjo terminologji dhe ky togfjalësh nuk e di se ekziston në menaxhimin e proceseve në shëndetësi, kjo me siguri se përbën "inovacion" në vete, por është mirë të shpjegohet. Pjesa hyrëse flet për panjohuritë për virusin covid-19 në fillim të viti 2021 dhe kjo sikur virusi ka filluar në vitin 2021, por virusi ka filluar në fillim të vitit 2020, ndërsa në fund të po të njëjtës faqe thuhet se kemi bërë njohuri në vitin 2021, derisa më herët ishte shënuar sintagma e funksionimit t'u pa t'u ba, d.m.th kjo informatë një pjesë është e vitit 2020 ndërsa një pjesë është e vitit 2021. Në sektorin e shëndeti publik, pyetja e parë është se përse është shuar vendi i punës i shefit të Sektorit të shëndetit publik të cilin e ushtronte i ndjeri Dr. Safet Idrizi, dhe i njëjti është zëvendësuar me një vend pune në administratë për shkak të punësimeve politike dhe pyetja është se kush e ka udhëhequr këtë sektor gjatë vitit 2021. Pastaj thuhet se laboratorit dhe rëntgenit bëjnë pjesë në diagnostikë dhe kanë të rëndësishme për mjekun, për këtë pyeti se çfarë kuptim ka kjo fjali? Ky përkufizim është i nivelit fillor të të shkruarit. Shërbimet e GPS nuk janë përkufizuar se a janë funksionale dhe se në çfarë konteksti janë duke u përdorur, a janë duke e dhënë efektin e kursimit të derivateve siç i kishin dikur në kohën kur ai i kishte implementuar. Qendra e Edukimit të Vazhdueshëm Profesional, këtu shkruhet: trajnerët e infermierëve, gjatë pandemisë i kam lutur që përveç punëve të planifikuara të bëjnë trajnime për stafin për higjienën, shtrohet pyetja se kush i ka lutur, dhe se a ka ardhur puna në QKMF-ja të funksionojë në saje të lutjes së stafit, andaj është e turpshme që ky raport të jetë objekt medial, dhe bëhet skandal se çfarë niveli i dokumentacionit kalon në Kuvendin e Komunës së Vushtrrisë. Tek pjesa e bashkëpunimit me AQH-në ku thuhet jemi ndihmuar me pajisje të shumta mjekësore, aparatura dhe inventar dhe mes tjerash gjatë fillimit të vitit 2021 do të realizohen dy laboratorë, d.m.th po flasim për vitin 2020 që janë paraparë ndërtimi i dy laboratorëve në kohën kur ai ka udhëhequr Drejtorinë e Shëndetësisë, ato janë ndërtuar në vitin 2021 dhe kjo është mirë, por në informatë duhet të ceket se këto projekte janë përfunduar. Tutje tek pjesa e investimeve kapitale, e ka cekur shumë shpesh, por edhe në fushatë paraelektorale sepse ka pasur një luftë për t'i përvetësuar meritat për të arritur në fushën e shëndetësisë përgjatë qeverisjes trivjeçare, dhe në këtë kontekst ceku se të gjitha projektet kapitale në shëndetësi në vitin 2021 kanë shkuar në suficit dhe kjo është e vërtetë. Kjo është kështu edhe përkundër faktit se ka informacione se të gjitha projektet dhe kërkesat nga QKMF kanë shkuar me kohë dhe për këtë pyeti se çka ka ndodhur sepse njëri nga zyrtarët e prokurimit tani është emëruar drejtor dhe ai duhet të ketë informata se ku kanë ngecur punët dhe përse nuk janë realizuar këto projekte, por edhe tjerët që kanë qeverisur në këtë kohë duhet ta kenë përgjigjen se janë thirrur se kanë qenë projekte të ish-qeverisjes me emër të ish-kryetarit të komunës dhe përse nuk janë realizuar këto projekte: teknologji informative 20,000.00 €, pajisje mjekësore 85,000.00 €, furnizim me inventar 32,186.062 €, ndërtimi i recepcionit në objektin e ri të QKMF-së 4000.00 €, rehabilitimi dhe izolimi i rëntgenit dhe ventilimi për objektin e ri të QKMF-së 43,523.00 €, rehabilitimi dhe adoptimi i laboratorit në QMF-3 4000.00 €, rregullimi i oborrit të objektit të ri të QKMF-së 30,589.23 €, gjithsej 217,112.23 € kanë shkuar në suficit në kohë pandemie në nevoja të sistemit shëndetësor për përmirësim të vazhdueshëm të gjendjes në suficit për shkak të neglizhencës, keqmenaxhimit dhe ndryshimit që ka ndodhur, një gjë e tillë nuk ka ndodhur në vitet paraprake në një situatë të tillë. Mandej thuhet se jemi në fazën e rekrutimit të dy doktorëve specialistë të mjekësisë familjare një stomatolog, një referent dhe një punëtor për ngrohtore. Ai ka parë konkursin që kërkohen dy stomatologë, kjo kuptohet se njëri është për vendin e tanimë drejtorit aktual të emëruar, por edhe kjo është në kurriz

të shuarjes së një vendi, por për çfarë qëllimesh është duke u bërë kjo na mbetet në seancat tjera të shohim ku duhet të kemi një arsyetim se përse duhet të shuhet një vend pune. Nganjëherë është qesharake informata ku në fund thuhet faleminderit dhe shënohen tri !!! me respekt kryerësi i punës së drejtorit të QKMF-së – Vushtrri, dhe ky emërtim nuk mund të gjendet në asnjë normativ shëndetësor, sepse ose duhet të ketë drejtor të QKMF-së, ose ushtrues detyre të drejtorit të QKMF-së. Sa i përket raportit të Shtëpisë Rezidenciale në Lumadh na del edhe diçka që është joetike dhe bie në kundërshtim me ligjin, sepse aty janë publikuar emrat e banorëve rezidentë ku identiteti i tyre është i mbrojtur me ligj, sepse është kundër etikës mjekësore publikimi i emrit të një banori i cili ka ngecje në zhvillimin psiko-motorik, ku ky raport publikohet në faqen e komunës dhe është i qasshëm për publikun dhe mediat. Kjo përbën shkelje të deontologjisë dhe etikës mjekësore dhe për këtë mund të pasojnë edhe suspendime nga detyra për ata përgjegjës. Në fund tha se kritikata e lartshënuara nuk kanë të bëjnë me baza individuale apo personale e aq më shumë për profesionistë shëndetësorë që kanë bërë një punë të shkëlqyeshme, por aksenti ishte tek cilësia e kësaj informate e cila nuk i përmbush standardet minimale të raportimit.

Agron Përçuku, anëtar i kuvendit – tha se gjatë periudhës së pandemisë janë kryer shumë punë nga profesionistët shëndetësor, por pavarësisht nga kjo mbetet shumë për t'u bërë. Tutje pyeti drejtorin e shëndetësisë se përse është mbyllur laboratorin në Lumadh, përse nuk mbahet ndërrimi i dytë i laboratorit dhe rëntgenit, si dhe reparti i stomatologjisë kur dihet se në vitin 2021 është raportuar dhe është hedhur ideja se është mirë të punohet në dy ndërrime në laborator, për shkak të gjendjes së pandemisë, si dhe në laboratorin e QKMF-së, aparaturat janë dërguar në servisim të njëjtat nuk janë kthyer, andaj kur do të kthehen në funksion.

Ilmi Azemi, anëtar i kuvendit – kërkoi nga kryesuesja e kuvendit që të ketë për bazë rregulloren e punës të kuvendit sa i përket kohëzgjatjes së minutazhës në diskutimet e anëtarëve të kuvendit, ashtu që të respektohet koha e caktuar në rregullore. Tutje shtoi se informata në fjalë që po shqyrtohet të cilës është bashkuar edhe informata për QPS-në dhe ajo për shërbime rezidenciale, vlerëson se këto të fundit nuk kanë qenë objekt shqyrtimi nga plani i punës së kuvendit, por edhe përkundrejt kësaj ato vetëm sa e kanë pasuruar këtë informatë. Mandej kërkoi nga ish drejtorët që të jenë më konstruktiv në deklaratimet e tyre në kuvend t'i shërbejnë frymës së bashkëpunimit dhe tolerancës në mes veti. Pastaj shtoi se deklaratimet në stilin e përqeshjes dhe përluljes për gjoja se dikush i njeh punët më mirë në një dikaster nuk i shërben askujt dhe nuk ndikon në ngritjen e performancës as në QKMF e as në Drejtorinë e Shëndetësisë.

Faton Hyseni, anëtar i kuvendit – duke ju referuar diskutimit të anëtarit të kuvendit z.Meholli, vlerësoi se informata në fjalë është e vitit 2021, dhe drejtori aktual nuk ka qenë atëherë në udhëheqjen e drejtorisë, e që i bie se të gjitha kritikata për informatën duhet adresuar qeverisë së kaluar dhe jo ndaj kësaj qeverie.

Sylejman Meholli, anëtar i kuvendit – tha se adresimi i kritikave të tij nuk janë të karakterit personal dhe individual por lidhen me përmbajtjen e informatës me qëllim të përmirësimit.

Ymer Haradinaj, anëtar i kuvendit – ngriti shqetësimin e prindërve të nxënësve të klasës së parë, në Stanoc të Epërm të cilët para disa muajve janë vaksinuar, por që gjatë këtij procesi ata kanë pasur frikë të madhe, dhe kjo ka ndikuar tepër keq ku njëri nga fëmijët nga atëherë refuzon të shkojë në shkollë. Lidhur me këtë problematikë apeloj që kur kemi rastet të tilla të imunizimit një ose dy ditë më herët të njoftohen prindërit ashtu që të lehtësohet ky proces. Po ashtu ai kërkoi që të ketë një bashkëpunim më të madh mes zyrtarëve shëndetësor-mësimdhënësve dhe prindërve në kohën kur ka procese të vaksinimit.

Mentor Hasani, anëtar i kuvendit – tha se sa i përket drejtshkrimit në këtë informatë pajtohet se ka defekte, porse nuk e dëmton esencën e informatës. Lidhur me sintagmën <t'u pa t'u ba> e

theksuar në informatë sqaroi se ky model i punës është i përshtatshëm për faktin se covid-19, ka qenë një sëmundje jo e njohur për të gjithë dhe përderisa ka qenë e panjohur ka pasur ndryshim të simptomatologjisë, për këtë arsye mund të pranohet kjo shprehje. Sa i përket shëndetit publik është e vërtetë se një kohë nuk ka pasur përgjegjës, por ka pasur ushtrues detyre, nëse jo me kontratë ka qenë me detyra të punës. Lidhur me laboratorët vlerësoi se të gjithë jemi të informuar me problemet që janë aty, dhe shpreson se me ardhjen e drejtorit të ri në detyrë këto probleme do të zgjidhen. Objekti i QKMF-së është dashur vitin e kaluar të jetë i përfunduar dhe funksional, por kjo akoma nuk ka ndodhur dhe për këtë duhet të japin përgjigje ish-drejtorët e kaluar se një projekt i tillë nuk ka përfunduar. Laboratori në fshatin Lumadh është hapur pikërisht në fushatë dhe kjo është bërë për qëllim elektorale, sepse janë marrë punëtorë për të punuar për një përudhë prej 4 muajve më pas ata janë larguar nga puna, kështu ata janë mashtruar nga qeveria e kaluar. Funksionalizimi i laboratorit duhet të bëhet përmes rekrutimit të stafit për laborant me konkurs të rregullt dhe në suaza ligjore. Lidhur me imunizimin e nxënësve, njoftoi se para se ky proces të realizohet bëhet paralajmërimi i drejtorit të shkollës nga stafi mjekësor dhe gjithçka shkon në koordinim të plotë.

Sylejman Mehulli, anëtar i kuvendit – duke replikuar me parafolësin e tij sqaroi se corona-virusi nuk ka qenë sëmundje e panjohur sepse në të gjitha provimet e mikrobiologjisë familjen e corona-virusve e ke temë të shpjeguar kaheerë. Pandemia ka shpërthyer me 31 dhjetor 2019 në Wuhan të Kinës, nuk ka qenë aktive, por virusi nuk është se ka qenë i panjohur. Masat e ndërmarra janë njohur në gjithë botën prej OBSH-së, e deri tek IKSHPK-ja dhe kjo varet se a i kemi bërë apdate, ky është qëllimi. Më tej shtoi se në QKMF, kemi kuadër që ka një shkollim solid, dhe që si staf kanë bërë punë të jashtëzakonshme dhe për këtë iu njeh meritat, por e vërteta është se informata e ofruar në kuvend nuk është e dinjitetshme për ta prezantuar institucionin dhe për të adresuar punën e madhe që është kryer sepse kjo informatë nuk i plotëson as standardet minimale të një dokumenti për informim dhe raportim sepse ka defekte të mëdha në aspektin drejtshkrimor dhe logjik të fjalës. Mandej nuk morëm përgjigje për çështjen më të ndërlikuar që është inkorporuar në informatë siç është shpallja e identitetit të banorëve në shtëpinë rezidenciale në fshatin Lumadh, që është një shkelje flagrante e drejtave fundamentale të njeriut dhe shkelje e etikës mjekësore.

Nexhmedin Rashica, drejtor i DSHPS-së - tha se është obligim ligjor të raportohet para kuvendit, dhe sqaroi se informata në fjalë është e vitit 2021 kur ai nuk ka qenë i ngarkuar me përgjegjësinë e drejtorit. Në të ardhmen ai do ofrojë informata më të kompletuara duke bashkëpunuar edhe me lektoren e komunës. Informata është hartuar nga një grup zyrtarësh nga sektorë të ndryshëm dhe këtë gjendje e ka trashëguar, nga punëtorët që i ka vendosur Sylejman Mehulli.

Sylejman Mehulli, anëtar i kuvendit – njoftoi se asnjë zyrtar i lartë nuk është shkarkuar nga ana e tij, duke u ndikuar nga bazat politike apo partiake, ata që kanë qenë në pozita udhëheqëse kanë vazhduar në kryerjen e punëve të tyre. Shkarkimi i drejtoreshës së QPS nga ish - kryetari i komunës ka qenë i padrejtë, dhe ai e ka mbrojtur duke e shtyrë të ushtrojë ankesë në Këshillën e Pavarur Mbikëqyrës dhe e njëjta është kthyer në vendin e punës ku ka qenë. Shefja e shtëpisë Rezidenciale është emëruar pasi që drejtori është pensionuar, dhe emërimi nuk ka ndodhur në kohën e tij. Stafi dhe drejtoresha e QKMF-së, ka mbetur po ajo dhe e kanë pasur mbështetjen e plotë për gjitha punët e mira që janë kryer.

Nexhmedin Rashica, drejtor i DSHPS-së - sqaroi se ai ka qenë diskriminuar në kohën e ish-drejtorit. Tutje shtoi se si rezultat i burokracisë në procedurat e prokurimit, ka pasur një gjendje jo e mirë e furnizimit me materiale shpenzuese siç janë reagensat, dhe kjo ka bërë që të furnizohemi përmes një donatori.

Ferit Idrizi, Kryetar i komunës - tha se çdo kritikë me vend është e mirëseardhur dhe ndikon pozitivisht në përmirësimin e gjendjes. Tutje shtoi se kërkon falje për ata që e kanë lexuar se

informata për shërbimet shëndetësore nuk është e plotësuar, e njëjta ka nevojë të plotësohet, të jetë e qartë dhe të ketë një vijë akademike. Kjo informatë duhet të shkruhet në kohën e kryer sepse ka ndodhur në kohën e kaluar e jo në kohën e tashme, mandej citoi: jemi në përpjekje që si menaxhment që nga fillimi i vitit 2021 në bashkëpunim me DSHKP-së dhe IRSHPK-në dhe kemi njoftime zyrtare se duhet të jemi gati për përballje me virusin covid-19, d.m.th është e paqartë, dhe kërkoi nga drejtoria kompetente që herëve tjera të kemi një informatë të kompletuar si në aspektin drejtshkrimor ashtu edhe në atë përmbajtësor. Më tej apeloj tek këshilltarët e tij që t'i pranojnë me pozitivitet kritikën nga anëtarët e kuvendit pasi që ato ndikojnë në përmirësimin e punëve dhe gjendjes në përgjithësi.

Sylejman Mehulli, anëtar i kuvendit – përsëriti se nuk ka personale asgjë dhe me askënd, dhe shtoi se për krejt dështimet që kanë ndodhur gjatë vitit 2021 që nga suficiti në projektet kapitale e deri tek rënia e parametrave dhe numri i analizave në laborator nuk mund t'i adresohen në përgjegjësi drejtorit aktual të shëndetësisë, mirëpo ai përsëriti se kritika e tij ishte e adresuar në aspektin e informatës dhe përmbajtjes së saj.

5. Propozim – vendim për lirim nga pagesa e taksës për mbeturina, për familjet përfituese të asistencës sociale

Benjamin Shala, drejtor i DSHP-së - propozoi që në kuadër të këtyre lirimeve nga pagesa të futen edhe punëtorët e operativës-terrenit të Ndërmarrjes regjionale “Uniteti” njësia në Vushtrri, ndërsa shuma totale e mjeteve financiare e kufizimit të buxhetit nga ky vendim pa i përfshirë punëtorët e kompanisë “Uniteti” është 74,000.00 €.

Leonora Gërguri, anëtare e kuvendit - tha se për këtë propozim-vendim nuk është dhënë një arsytim i plotës, për faktin se nuk është sqaruar se sa është numri i familjeve që do të përfitojnë nga lirimi nga këto taksa, si dhe sa do të jetë kostoja financiare që komuna nuk do t'i inkasojë nga ky vendim apo thënë më ndryshe sa është shuma totale e të hyrave me të cilat do të dëmtohet buxheti i komunës.

Sylejman Mehulli, anëtar i kuvendit – në emër të grupit kuvendar të LVV-së deklaroi se e mbështesin këtë propozim-vendim.

Adnan Lahu, anëtar i kuvendit – tha se grupi kuvendar i LDK-së e mbështesin një praktikë të tillë dhe vota e tyre do të jetë pro.

Në fund të debatit lidhur me këtë pikë të rendit të ditës, kuvendi pas votimit me vota “unanime” vendosi me sa vijon:

1. Me këtë vendim lirohen nga pagesa e taksës për ofrimin e shërbimeve të grumbullimit të mbeturinave, familjet me asistencë sociale, familjet e punëtorëve të operativës-terrenit të Ndërmarrjes “Uniteti”, njësia në Vushtrri, në Komunën e Vushtrrisë.

2. Vendimi për lirimin nga obligimi i pagesës së taksës për shërbimet e mbeturinave bëhet si rezultat i rëndimit të gjendjes sociale të familjeve që përfitojnë nga skema sociale dhe atyre të punëtorëve të Ndërmarrjes “Uniteti”, njësia në Vushtrri, si pasojë e pandemisë covid-19, e njohur si Corona-virus.

3. Për zbatimin e këtij vendimi obligohen: Drejtoria për Shërbime Publike dhe Drejtoria për Buxhet dhe Financa, si dhe Drejtoria për Shëndetësi dhe Mirëqenie Sociale.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë dhe fillon të prodhojë efekt juridik nga data 1 janar 2022 deri më datë 31 dhjetor 2022.

6. Shqyrtimi i Propozim – vendim për ndarjen e subvencioneve

Leonora Gërguri, anëtare e kuvendit - tha se në propozim-vendim është lëshuar një gabim teknik ku në vend të vitit 2022 ceket viti 2020, këto gabime duhet të evitohen nga dokumentet zyrtare, ndërsa pyeti drejtoreshën e kulturës ku ceket se tek subvencionimi i OJQ-ve shuma totale është 74,000.00 €, kurse në mbledhjen e kaluar kur është aprovuar buxheti ka ekzistuar një propozim për ndarjen e një shume financiare prej 100,000.00 € për Klubin e futbollit “Vushtrria”, kjo për nder të 100 vjetorit të themelimit të këtij klubi, ky propozim është aprovuar nga kuvendi i komunës, por që nuk është inkorporuar në subvencione tek OJQ-të.

Sylejman Mehulli, anëtar i kuvendit – tha se këtë propozim-vendim e kemi mbështetur edhe në Komitetin për Politikë dhe Financa duke shprehur një fleksibilitet në shtyllat e caktuara të subvencioneve, sepse e kemi mirëkuptuar nevojën për të mos bërë planifikim të shpejtë, por ka ndryshuar dy herë gjatë procesit dhe kjo ka bërë që mos të kemi një hapësirë të duhur për ta analizuar këtë çështje. Megjithëkëtë ai shpreson që qeveria komunale e ka bërë orientimin më të mirë të mundshëm dhe vota e tyre do të jetë pro për faktin se nga ky vendim adresohen dhe financohen nevojat për bursat e studentëve, për OJQ-të, klubet e sportit, persona që vuajnë nga sëmundjet e ndryshme e të ngjashme. Por nuk e di nëse kalkulimi i këtyre shumave është bërë si duhet p.sh pozicioni Kompensimi për fëmijët e porsalindur dhe rastet me Covid-19. 47,540.00 €, për këtë nuk ka siguri që kjo shumë është e mjaftueshme për të mbuluar koston financiare të këtij vendimi, sepse në vitin kur është marrë ky vendim kemi pasur mbi 800 lindje dhe bazuar në këtë $800 \times 120 = 96,000.00$ €, ndërsa në propozim ne i kemi 47,540.00 € për fëmijët e porsalindur dhe për rastet me covid-19, andaj kjo shumë është e pamjaftueshme për ta mbuluar koston e vendimit sa i përket këtij pozicioni. Andaj në këtë kontekst duhet pasur kujdes që mos të futet në borxhe komuna dhe të vijmë deri tek situata kur nuk do të mund t'i realizojmë këto subvencione. Pastaj tek pjesa Financimi i OJQ-ve përfshirë shoqatat e luftës së UÇK-së, vlera financiare 27,000.00 €, konsideron se nuk është e mjaftueshme sidomos duke e ditur faktin se në këtë pako buxhetore subvencionohet edhe HANDIKOSI dhe zakonisht e merr gjysmën e këtyre mjeteve financiare, kështu shoqatave të dala nga lufta e UÇK-së dhe shoqatave tjera nga lëmi i shëndetësisë ju mbetet pak buxhet, andaj duhet të shikohet mundësia që ky pozicion buxhetor të rritet. Subvencionimi në bujqësi më parë ka qenë i specifikuar në kode dhe projekte se si do të ndahen subvencionet, tani kemi një pako si total, por është interes të njoftohet kuvendi se cilat projekte do të mbështet-subvencionohen në këtë vit çfarë natyre do të kenë ato projekte dhe cili do të jetë impakti i tyre. Tek Drejtoria e Arsimit, pozicioni Shpërblime për nxënës, 6,500.00 €, kërkoi të dihet se për cilat shpërblime bëhet fjalë dhe çfarë kriteri do të përdoret në ndarjen e këtyre mjeteve. Në fund tha se edhe përkundër faktit se mungon fondi për subvencionimin e klubit të futbollit në vlerën prej 100,000.00 €, ata prapëseprapë nuk do ta bllokojnë këtë vendim pasi që nga ky varen shumë skema të rëndësishme komunale që kanë nevojë imediate të subvencionohen.

Ymer Haradinaj, anëtar i kuvendit – shtroi çështjen lidhur me pozicionin Bashkëfinancim me donatorë për banim për familjet pa strehë në vlerë prej 10,000.00 €, ndërsa në mandatin e kaluar është vendosur të ndahen 5,000.00 € për ndërtimin e një shtëpie, dhe për ndërtimin e 20 shtëpive ish-in ndarë 100,000.00 €, ndërsa shuma aktuale prej 10,000.00 € nuk është e mjaftueshme sepse

më këtë do të mund të ndërtohen vetëm dy shtëpi. Andaj propozoi që brenda mundësive financiare të rritet ky fond sepse kemi shumë familje që kanë problem të banimit.

Remzi Ahmeti, drejtor i DBF-së - paraqiti sqarime në linja të përgjithshme, duke cekur se shuma totale e subvencioneve duhet të jetë e përmirësuar 657,540.00 €, ndërsa pjesa e vakumit financiar sa i përket subvencioneve mendohet të përmbushet nga të hyrat e bartura.

Medina Bunjaku, drejtoreshë e DKRS-së - sqaroi se totali i subvencioneve në Drejtorinë e Kulturës, do të jetë 90,000.00 €, ndërsa pjesa prej 30,000.00 € do të plotësohet nga të hyrat e bartura, varësisht prej kërkesave ekuivalente që do të kemi. Sa i përket subvencionimit të klubit të futbollit nga takimet që kanë pasur ka shumë donatorë që janë paraqitur për t'i dalë në ndihmë klubit, duke u bazuar në Ligjin për Sponsorizim në kuotën e 30 %.

Ferit Idrizi, Kryetar i komunës - sqaroi se korniza apo tavani i subvencioneve për vitin 2022 është 657,540.00 €, dhe jashtë kësaj kornize buxhetore mund të dilet, mund të kemi lëvizje, por vetëm brenda kësaj shume duke ndryshuar pozicionet e caktuara. Pastaj shtoi se subvencionet në bujqësi janë planifikuar si shumë totale, kjo për faktin se ai ka zhvilluar takime të ndryshme me bujqit, bletarët, pemëtarët dhe kategoritë tjera, dhe i ka marrë kërkesat nga ta, kështu që subvencionet do të shpërndahen konform këtyre kërkesave. Blegtorët janë në krizë dhe ata njëzëri kanë kërkuar subvencionim të qumështit. Andaj ideja është që të përfitojnë të gjithë dhe atë konform sasisë së qumështit që prezantojnë, por nëse ka kërkesa do të subvencionohet edhe ujitja e tokave. Pjesa e mjeteve e propozuar nga anëtarja e kuvendit nga LVV-ja, në vlerë prej 30,000.00 € do të plotësohet prej të hyrave të bartura. Nga takimet që ka pasur me bizneset ka marrë zotime se 30% të fitimit të tyre do të mund ta dedikojnë për financimin e nevojave të klubit të futbollit.

Fatmire Cecelia, anëtare e kuvendit - tha se shuma e subvencioneve në DKRS, është dashur të jetë ashtu siç ishte votuar në mbledhjen e kaluar në vlerën prej 120,000.00 €, dhe jo tani të arsyetojmë se shuma prej 30,000.00 € do të plotësohet prej të hyrave të bartura. Gjithashtu kërkoi që të respektohet vendimi me të cilin është licencuar Qendra rinore, sa i përket shfrytëzimit të atij objekti.

Shpëtim Zhegrova, nënkryetar i komunës - sqaroi se kur është aprovuar buxheti i komunës për vitin 2022, limiti i subvencioneve në bazë të qarkoreve buxhetore të Ministrisë së Financave ka qenë 657,540.00 €, dhe përkundër vullnetit të mirë për t'i rritur subvencionet, nuk mund të dalim jashtë këtyre limiteve të përcaktuara nga niveli qendror. Sa i përket mundësisë së rritjes së këtyre fondeve qoftë për fëmijët e porsalindur apo tek kategoritë tjera kjo mbetet vetëm përmes të hyrave të bartura.

Adnan Lahu, anëtar i kuvendit – tha se i kuptojnë mirë limitet buxhetore dhe mundësitë financiare të komunës, por në mbledhjen e kaluar kur është aprovuar buxheti i komunës, kanë qenë të inkorporuar propozimet e anëtarëve të kuvendit siç ishte ai për klubin e futbollit dhe propozimet tjera të cilat nuk figurojnë se janë inkorporuar në buxhet.

Ferit Idrizi, Kryetar i komunës - përsëriti se brenda totalit të subvencioneve mund të barten mjetet për klubin në vlerë prej 100,000.00 €, por sigurisht se do të mbeten keq kategoritë tjera, dhe sqaroi se mundësia e vetme për rritjen e subvencioneve është përmes të hyrave të bartura.

Sylejman Mehulli, anëtar i kuvendit – tha se që dy apo tri herë grupi kuvendar i LVV-së që ai e përfaqëson ka treguar konstruktivitet kur kanë votuar shuma totale të projekteve, por për këto më vonë do të shihet se sa janë transparente qeverisja komunale, sikur është rasti me projektet kapitale në hartimin e listës së rrugëve që do të asfaltohen dhe në ndarjen e mjeteve për subvencione në lëmin e bujqësisë.

Ferit Idrizi, Kryetar i komunës - u zotua para kuvendit se do të jetë plotësisht transparent sa i përket shpenzimit të parasë publike dhe orientimit të projekteve kapitale.

Mek Selaci, anëtar i kuvendit – tha se propozimi i tij prej 100,000.00 € për klubin e futbollit ka qenë i qëlluar, por të gjithë qytetarët nuk kishin besuar se ky propozim do të jetësohet, dhe atij i vjen shumë keq që ata kanë pasur të drejtë, sepse vetëm është shfrytëzuar vota e tij për aprovimin e buxhetit.

Mentor Hasani, anëtar i kuvendit – propozoi që shuma e subvencioneve për një fëmijë të porsalindur të bëhet 140 €.

Në fund të debatit lidhur me këtë pikë të rendit të ditës, kuvendi pas votimit me 32 vota “për” 1 votë “abstenim” vendosi me sa vijon:

1. Mjetet financiare të buxhetit të komunës – subvencione dhe transfere të vitit 2022 në shumë të përgjithshme prej 657,540.00 €, shpërndahen sipas drejtorive/sectorëve, zyrave) të cekura si më poshtë:

1.1 Zyra e Kryetarit:

Subvencione për raste veçanta (fatkeqësi natyrore etj.)40,000.00 €

1.2 Drejtoria për Shëndetësi dhe Përkujdesje Sociale:

1.2.1 Marrëveshja me Islamic Relief (vizita mjekësore në shtëpi)....100,000.00 €

1.2.2 Ndihmë për strehim – (qiratë e banimit).....20,000.00 €

1.2.3 Ndihmë për shërim.....28,000.00 €

1.2.4 Ndihmë financiare apo artikuj ushqimor për familjet skamnore.10,000.00 €

1.2.5 Financimi i OJQ-ve përfshirë shoqatat e luftës së UÇK-së.....27,000.00 €

1.2.6 Bashkëfinancim me donatorë për banim për familjet pa strehë..10,000.00 €

1.2.7 Marrëveshja për bashkëfinancim me Shoqatën “J. e Ballkanit...20,000.00 €

1.2.8 Kompensimi për fëmijët e porsalindur dhe rastet me Covid-19.47,540.00 €

Gjithsej.....262.540.00 €

1.3 Drejtoria për Ekonomi, Bujqësi dhe Zhvillim Rural

Subvencione në bujqësi..... 200,000.00 €.

1.4 Drejtoria për Kulturë, Rini dhe Sport:

1.4.1 Botimi i librave dhe publikimeve6,000.00 €

1.4.2 Financimi i OJQ-ve..... 74,000.00 €

1.4.3 Teatri i qytetit..... 10,000.00 €

Gjithsej.....90,000.00 €

1.5 Drejtoria për Arsim

1.5.1	Bursa për studentë.....	27,000.00 €
1.5.2	Transporti i nxënësve me nevoja të veçanta.....	20,000.00 €
1.5.3	Transporti i fëmijëve të familjeve me kushte të rënda sociale.....	1,500.00 €
1.5.4	Shpërblime për nxënës.....	6,500.00 €
1.5.5	Bursa për nxënësit e klasave të 10-ta, drejtimi përpunues i drurit dhe metalpunues.....	5,000.00 €
	Gjithsej.....	60,000.00 €

1.6 Zyra Lokale e komuniteteve (për riintegrim të personave të riatdhesuar – për subvencionim të qirasë së tyre)..... 5,000.00 €

2. Për zbatimin e këtij vendimi obligohen: Drejtoria për Buxhet dhe Financa, Drejtoria për Shëndetësi dhe Përkujdesje Sociale, Drejtoria për Kulturë, Rini dhe Sport, Drejtoria për Ekonomi, Bujqësi, Pylltari dhe Zhvillim Rural, Drejtoria për Arsim, Zyra e Kryetarit të komunës dhe Zyra lokale e komuniteteve.

3. Ky vendim hynë në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) pas publikimit në faqen zyrtare të Komunës së Vushtrrisë.

7. Shqyrtimi i Propozim – vendimit për aprovimin e nismës, për identifikimin e shtëpive – shkolla (themelimi i komisionit)

Adnan Lahu, anëtar i kuvendit – në emër të grupit kuvendar të LDK-së, propozoi Shkelzen Xhaferin për anëtar të komisionit për identifikimin e shtëpive – shkolla.

Mek Selaci, anëtar i kuvendit – në emër të grupit kuvendar të LVV-së, propozoi Refik Malokun për anëtar të komisionit për identifikimin e shtëpive – shkolla.

Ali Januzi, anëtar i kuvendit - kërkoi që të gjitha shtëpitë-shkolla të identifikohen, dhe në të gjitha ato objektet të vendoset nga një pllakë me shkrim identifikues që ato shtëpi janë shfrytëzuar për procesin mësimor apo shtëpi-shkollë në vitet e sistemit paralel të arsimit.

Pas shqyrtimit të kësaj pike të rendit të ditës, kuvendi pas votimit me 32 vota “për” 1 votë “kundër” vendosi me sa vijon:

1. Me këtë vendim themelohet grupi për identifikimin dhe vlerësimin e “Shtëpi-shkollave” në Komunën e Vushtrrisë, në përbërjen si në vijim:

- 1.1 Galip Avdiu, kryesues i grupit vlerësues PDK;
- 1.2 Shkelzen Xhaferi, anëtar i kuvendit LDK;
- 1.3 Refik Maloku, anëtar i kuvendit LVV;
- 1.4 Bedri Tahiri, anëtar;
- 1.5 Fahri Pllana anëtar.

2. Grupi identifikues-vlerësues në përbërje të cekur si në pikën paraprake të këtij vendimi, do të bëjë identifikimin e “Shtëpi-shkollave” në tërë territorin e Komunës së Vushtrrisë.
3. Grupi identifikues-vlerësues ka për obligim që brenda një afati të caktuar kohor të informojë Kryetarin e komunës dhe kuvendin për të gjeturat në terren.
4. Grupi në koordinim me Kryetarin e komunës do të përcaktohen për formatin dhe shkrimin e pllakës që do të vendoset në shtëpi-shkolla.
5. Për zbatimin e këtij vendimi obligohen: komisioni i cekur në pikën 1 të këtij vendimi dhe Zyra e kryetarit të komunës.
6. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.
8. Shqyrtimi i rekomandimit për shfuqizimin e pjeshëm të vendimit të kuvendit me Nr. protokollit 01Nr.125/14 i datës 28.5.2014, apo shkëputjes së kontratave për dhënien në shfrytëzim të kioskave

Albanez Tahiraj, drejtor i DGJKP-së - njoftoi kuvendin se lidhur me këtë çështje është ngritur një komision nga kryetari i komunës, që ka pasur për detyrë mbikëqyrjen e shfrytëzimit të këtyre pronave (kisosqeve), konform kontratave të lidhura mes komunës dhe palëve tjera kontraktuese. Komisioni në fjalë ka bërë një raport të detajuar, ku ndër të tjera ka konstatuar se disa prej këtyre lokaleve nuk janë duke u shfrytëzuar sipas kontratës.

Ilmi Azemi, anëtar i kuvendit - tha se është mirë që po bëhet verifikimi i dhënies së pronës në shfrytëzim se a janë duke u shfrytëzuar pronat komunale sipas destinimi të tyre, dhe kërkoi të sqarohet se ky proces a ka pasur një projekt-menaxher dhe se i njëjti a ka paraqitur vërejtje me shkrim se nuk ka pasur respektim të kontratës. Më tej ai vlerësoi se nëse kemi mosrespektim të kontratës, atëherë duhet të shkëputen këto kontrata, por ceku se do të jetë e vështirë të hapet procedura e sërishme e ankandit, pasi që me një nga nenet e kontratës thuhet se investimet në ato objekte i bartë investitori, dhe në rastin konkret komuna do ta ketë vështirë të gjejë modalitet për kthimin e atyre investimeve.

Adnan Lahu, anëtar i kuvendit – tha se kuvendi i komunës vendos për dhënien e pronës në shfrytëzim afatshkurtër dhe afatgjatë, ndërsa për më pak se një vit vendos kryetari i komunës. Ajo që duhet kuptuar është se kuvendi nuk vendos për shkëputjen e kontratës dhe për këtë arsye ai nuk e di se përse ka pasur nevojë që ky material të sillet në kuvend.

Sylejman Mehulli, anëtar i kuvendit – tha se ky material duhet të analizohet mirë të hiqen të gjitha dilemat ligjore dhe më pas është dashur të sillen në kuvend për aprovim, andaj propozoi që kjo pikë e rendit të ditë të shtyhet për ndonjë nga mbledhjet e radhës pasi të jepen të gjitha sqarimet e duhura juridike.

Albanez Tahiraj, drejtor i DGJKP-së - sqaroi se kryesuesi i komisionit është projekt-menaxher, ndërsa sa i përket kompensimit të investimeve në ato prona-objekte, në njërin nga nenet e kontratës specifikohet se nëse kontrata shkëputet para kohës, atëherë kompensimin e pjesës së mbetur të investimeve e bënë komuna në saje të një ekspertize të pavarur. Lidhur me dilemat ligjore ai sqaroi se të gjitha argumentet juridike janë prezantuar, se kemi të bëjmë me një material të kompletuar juridikisht dhe se këto kontrata duhet të shkëputen sepse janë shkelur kushte që dalin nga to.

Ferit Idrizi, Kryetar i komunës - propozoi që kjo pikë e rendit të ditës të shtyhet për ndonjëherë nga mbledhjet e ardhshme të kuvendit, pasi të merret mendimi dhe të bëhet një analizë e mirëfilltë.

Në fund të debatit, kuvendi pas votimit me vota “unanime” vendosi që kjo pikë e rendit të ditës të shtyhet për ndonjëherë nga mbledhjet e ardhshme të kuvendit.

9. Shqyrtimi i Propozim – vendimit për ndryshimin dhe plotësimin e vendimit për themelimin e Këshillit Komunal për Siguri në Bashkësi

Pas shqyrtimit të kësaj pike të rendit të ditës, kuvendi pas votimit me vota “unanime” vendosi me sa vijon:

1. Me këtë vendim, ndryshohet dhe plotësohet vendimi i Kuvendit të Komunës 01Nr.24/22, dt. 31.1.2022, përkatësisht paragrafi 1, pika 1.4 ashtu që në vend të, **Maliq Ferizit**, drejtor për mbrojtje dhe shpëtim, zëvendësohet nga **Bajram Beqiri**, zyrtar në Drejtorinë për Mbrojtje dhe Shpëtim në Vushtri.

2. Për zbatimin e këtij vendimi obligohen: menaxheri i personelit dhe Sekretaria e Kuvendit të Komunës së Vushtrrisë.

3. Ky vendim hynë në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe 7 ditë pas publikimit në faqen zyrtare të Komunës së Vushtrrisë.

10. Shqyrtimi i Propozim – vendimit për caktimin e lokacionit për ndërtimin e tregut të gjelbër të prodhuesve vendorë në Komunën e Vushtrrisë

Gresa Muli, anëtare e kuvendit - pasi i përshëndeti të pranishmit, tha se grupi kuvendar i LVV-së e përkrah fuqishëm këtë pikë të rendit të ditës dhe pyeti se cila do të jetë dinamika e këtij projekti, dhe kur do të mund të shohim vendosjen e shitësve në atë treg. Pastaj ajo shtoi se i vjen mirë që kryetari aktual i komunës ka marrë për bazë zotimin e LVV-së në Vushtri për ndërtimin e tregut për këta shitës që po shesin produktet e tyre në rrugë këtu afër objektit të komunës. Parcela e propozuar do të jetë një vend ideal për vendosjen e tregut të gjelbër, sepse është në qendër të qytetit dhe do të jetë shumë i qasshëm për qytetarët të cilët do të mund të blejnë produktet që ju nevojiten shpejt dhe shpesh, por pozitive do të jetë edhe për shitësit se do t'i plasojnë produktet e tyre në një vend adekuat dhe kështu do t'u rritet edhe puna apo qarkullimi i tyre. Në fund ritheksoi dhe vlerësoi lart mosinJORimin dhe gatishmërinë e kryetarit të komunës për të realizuar një ide që ka herë ka qenë e LVV-së në Vushtri dhe po ashtu është në interesin e përgjithshëm qytetar.

Adnan Lahu, anëtar i kuvendit – tha se si projekt dhe si lokalitet është i përshtatshëm për ndërtimin e tregut të gjelbër, dhe si grup i LDK-së e përkrahin, por nëse ky treg ndërtohet nga fondet që dalin nga memorandumit bashkëpunimit mes Komunës së Vushtrrisë dhe Islamic Relief atëherë ata nuk do ta votojnë këtë pikë të rendit të ditës. Kjo është kështu sepse ata në fushatë zgjedhore kanë marrë obligime se do të ndërtohet ai treg atje dhe atyre njerëzve do t'u krijohen kushte më të mira të punës, me një treg modern që i plotëson kushtet. Pastaj njoftoi se nga memorandumit me Islamic Relief janë akorduar 400,000.00 US\$ dhe aty do të bëhet një treg

modern, ndërsa lokacioni aktual në hapësirë prej 16 ari është tepër i pamjaftueshëm për një treg, çfarë është menduar të ndërtohet sipas idesë së tyre.

Ilmi Azemi, anëtar i kuvendit - tha se për projekte të tilla ka qenë praktikë që të propozohen të paktën dy lokacione, ashtu që të hapet debati dhe të gjendet lokacioni dhe zgjidhja më e mirë e mundshme. Sido që të jetë konsideron se propozimi është i qëlluar, mirëpo këtu paraqitet se janë 1637 m² dhe nëse orientohemi në ortofoto del se minarja e Xhamisë është në këtë parcelë, dhe për këtë nuk e di se kompetentët a janë dal në terren për ta konstatuar këtë çështje. Lidhur me këtë ai vlerëson se kishte me qenë mirë që të evidentohet dhe definohet prona apo pjesët e parcelës të cilat do të mund të shfrytëzohen, kjo për faktin se përreth kemi shtëpi, lokale afariste dhe objekte tjera, të cilat do të mund të pengoheshin në qasje. Mbi bazën e kësaj sipas një llogarie të bërë nga ana e tij, del se në atë pronë do të mund të shfrytëzoheshin 6 deri në 7 ari por jo më tepër të sipërfaqes së parcelës. Në këtë propozim-vendim është evidentuar parcela 655, por fare nuk është inkorporuar në propozim-vendim parcela 654 e cila ka sipërfaqe prej më tepër se 1 ari në mes të pronës kah rruga "Hasan Prishtina". Këtu është dashur të inkorporohet edhe kjo parcelë pasi që është pjesë e këtij propozim-projekti. Lidhur me të gjitha këto ai ftoi të gjithë që ta votojnë këtë pikë por me plotësimet e propozuara, dhe në këtë kontekst vlerësoi se kishte me qenë mirë që bëhej një paramasë paraprake që të dihet saktë e drejta e disponimit në shfrytëzimin e asaj prone. Në fund propozoi që në vendim të inkorporohet edhe pjesa e parcelës 654.

Ferit Idrizi, Kryetar i komunës - tha se e rëndësishme është që po diskutohet për një projekt i cili ka rëndësinë për të gjithë qytetarët. Pastaj shtoi se do të ndërtohet një treg i përmasave jo të mëdha, ndërsa në të ardhmen do ta ndërtojmë edhe një treg të madh, kur komuna do të ketë mundësi financiare dhe konform kërkesave qytetare. Ideja e këtij projekti është që shitësit që po shesin produktet e tyre tek objektit i shtëpisë së mallrave, të hiqen nga rruga dhe të vendosen në atë lokacion, sepse nëse e marrim proporcionin e numrit të atyre shitësve do të jetë konform atij lokacioni, dhe terreni i lokacionit është adekuat sepse kemi qasje nga të dyja anët e rrugëve si nga ana e përme ashtu edhe ana e poshtme. Nëse ky projekt votohet sot, mendohet që të ndërtohet gjatë këtij viti, dhe më pas është menduar të nxirret një rregullore për menaxhimin e këtij tregu. Lidhur me këtë projekt njoftoi se i ka ftuar arkitektët e komunës dhe i ka pyetur se a mundet një lokacion i tillë të jetë adekuat dhe ka marrë konfirmim pozitiv. Ky projekt mendohet të realizohet përmes një konkursi publik që të kemi konkurrencë në idenë më të mirë në përzgjedhjen e projektit. Në fund lidhur me financimin e këtij projekti njoftoi se do të kërkojnë donatorë, dhe mendohet se kostoja financiare do të jetë 600-700 mijë euro, ndërsa njoftoi se donatori që kishte qenë më herët për ndërtimin e tregut të madh është deklaruar se është i dëshpëruar sepse prona ku është menduar të ndërtohet nuk gjendet në pronësi komunale.

Ali Januzi, anëtar i kuvendit - pyeti se për shitësit që do të vendosen në atë treg a do të aplikohen taksa?

Ferit Idrizi, Kryetar i komunës - tha se hapi i dytë për realizimin e këtij projekti do të jetë hartimi i një rregulloreje për menaxhimin e këtij tregu dhe me këtë rregullore do të vendoset se dëshirojmë të vendosim taksa për shitësit apo jo.

Agron Përçuku, anëtar i kuvendit - tha se e mbështesin këtë projekt, sepse këtyre shitësve ka herë iu është premtuar se do t'u gjendet një zgjidhje. Mirëpo për këta shitës ekziston një listë me emrat e tyre dhe ajo listë duhet të merrret për bazë që ata shitës të kenë prioritet gjatë vendosjes në atë treg.

Në fund të debatit lidhur me këtë pikë të rendit të ditës, kuvendi pas votimit me 26 vota "për" 6 vota "abstenim" vendosi me sa vijon:

1. Me këtë vendim caktohet lokacioni për ndërtimin e tregut të gjelbër për prodhime vendore në Vushtri, në parcelën kadastrale P-70202016-00655-0, në sipërfaqe prej 1637 m², Zona Kadastrale Vushtri, pronë e Komunës së Vushtrrisë.
2. Për zbatimin e këtij vendimi obligohen: Drejtoria për Shërbime Publike, Drejtoria për Urbanizëm dhe Mbrojtje të Ambientit, Drejtoria për Ekonomi, Bujqësi, Pylltari dhe Zhvillim Rural dhe Drejtoria për Gjeodezi, Kadastër dhe Pronë.
3. Pjesë përbërëse e këtij vendimi janë certifikata mbi të drejtën e pronës dhe kopja e planit
4. Ky vendim hynë në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

Mbledhja përfundoi në ora: 15:30

Bastri Duraku


Procesmbajtës

Melihate Basholli-Latifi


Kryesuese e Kuvendit

